



Republika e Kosovës
Republika Kosovo-Republic of Kosovo
Kuvendi - Skupština - Assembly

Legjislatura VI
Sesioni vjeshtor

Seanca e jashtëzakonshme e Kuvendit
SJ-054
Prishtinë, më 15 dhjetor 2018

PROCESVERBAL

**I SEANCËS SË JASHTËZAKONSHME TË KUVENDIT TË REPUBLIKËS SË
KOSOVËS, E MBAJTUR MË 15 DHJETOR 2018**

Seancën e jashtëzakonshme e kryesoi Kadri Veseli, kryetar i Kuvendit.

Kryetari i hapi punimet e seancës së jashtëzakonshme të Kuvendit të Republikës së Kosovës, sipas kërkesës së 42 deputetëve të Kuvendit.

Kryetari konstatoi se në sallë janë të pranishëm 61 deputetë.

Në fillim të seancës kryetari i njoftoi deputetët se Kryesia e Kuvendit ka vendosur që t'i propozojë Kuvendit miratimin e një deklarate, me të cilën dënohet ndalimi i deputetit të Kuvendit të Republikës së Kosovës, z. Slobodan Petroviq, nga policia serbe dhe mbajtjes për disa orë gjatë kalimit të kufirit Kosovë-Serbi, më 8 dhjetor 2018.

Kryetari e hodhi në votim propozim-deklaratën.

Kryetari konstatoi se nuk pati kuorum të mjaftueshëm për vendimmarrje.

Pastaj, kryetari procedoi me pikën e rendit të ditës:

1. Miratimi i Projekt-rezolutës mbi procesin e dialogut për normalizimin e marrëdhënieve ndërmjet Republikës së Kosovës dhe Republikës së Serbisë

Kryetari tha se 42 deputetë të Kuvendit kanë parashtruar kërkesë për miratimin e Projekt-rezolutës mbi procesin e dialogut për normalizimin e marrëdhënieve ndërmjet Republikës së Kosovës dhe Republikës së Serbisë.

Ai e ftoi deputetin e GP të PSD-së, z. Visar Ymeri, që në emër të propozuesit të paraqesë projekt-rezolutën.

Deputeti Visar Ymeri e paraqiti dhe e arsyetoi Propozim-rezolutën mbi procesin e dialogut për normalizimin e marrëdhënieve në mes të Republikës së Kosovës dhe Republikës së Serbisë. Ai kërkoi nga deputetët ta miratojnë këtë propozim-rezolutë. Diskutimi i tij i plotë është dhënë në transkript.

Në lidhje me Projekt-rezolutën mbi procesin e dialogut për normalizimin e marrëdhënieve në mes të Republikës së Kosovës dhe Republikës së Serbisë diskutuan deputetët: Memli Krasniqi, në emër të GP të PDK-së; Dukagjin Gorani, në emër të GP të PSD-së; Ahmet Isufi, në emër të GP të AAK-së; Bilall Sherifi, në emër të GP të Nismës Socialdemokrate; Albert Kinolli, në emër të GP 6+; Islam Pacolli, Milaim Zeka, Emilija Rexhepi, Bahrim Shabani dhe Danush Ademi, diskutimet e të cilëve janë dhënë në transkript.

Në fund të diskutimeve, kryetari e hodhi në votim projekt-rezolutën.

Rezultati i votimit ishte, si në vijim:

Për ----- 59,
Kundër ----- 0,
Abstenime ----- 2.

Kuvendi me shumicë votash e miratoi këtë:

R E Z O L U T Ë

Mbi procesin e dialogut për normalizimin e marrëdhënieve ndërmjet Republikës së Kosovës dhe Serbisë

I. Parimet e Marrëveshjes së qëndrueshme dhe gjithëpërfshirëse

Procesi i dialogut dhe i bisedimeve kuptohet si mënyrë efikase dhe e vetme për arritje të marrëveshjeve të qëndrueshme, gjithëpërfshirëse, ndërkombëtarisht të pranueshme dhe ligjërish të obligueshme ndërmjet dy shteteve fqinje: Republikës së Kosovës dhe Republikës së Serbisë.

Për qytetarët e Republikës së Kosovës dhe përfaqësuesit e tyre politikë, procesi i dialogut do të jetë i pranueshëm vetëm nëse përfundimi i tij do të rezultojë në:

- Njohje të ndërsjellë të shtetësisë nga palët e përfshira në proces;
- Anëtarësim të Republikës së Kosovës në Organizatën e Kombeve të Bashkuara (OKB);
- Zotim të verifikueshëm për përshpejtimin e proceseve integruese të Republikës së Kosovës në Bashkim Evropian dhe në NATO.

II. Përkufizimi dhe korniza e dialogut

Kuvendi i Republikës së Kosovës konsideron se për qytetarët dhe përfaqësuesit politikë të Republikës së Kosovës janë tri çështje fundamentale që e formësojnë kornizën, përmbajtjen dhe karakterin e procesit të dialogut dhe të marrëveshjes gjithëpërfshirëse të dalë nga ai:

- Integriteti territorial dhe karakteri unitar i shtetit të Kosovës
Kuvendi i Republikës së Kosovës rithekson se Kushtetuta e Republikës së Kosovës, sovraniteti shtetëror, integriteti territorial dhe karakteri unitar shtetëror i Republikës së Kosovës janë të pacenueshme dhe të patjetërsueshme.
- Interesi strategjik i shtetit të Kosovës
Republika e Kosovës synon të zhvillojë dhe të mirëmbajë fqinjësi të mirë, të anëtarësohet në Aleancën e NATO-s dhe në Bashkimin Evropian. Kuvendi i Republikës së Kosovës nuk do të përkrahë një proces të bisedimeve, i cili do ta kontestojë apo relativizojë këtë interes strategjik të shtetit të Kosovës dhe të qytetarëve të saj.
- Republika e Kosovës është rregullim shtetëror i demokracisë parlamentare dhe i shoqërisë sekulare brenda traditës multikulturore
Kuvendi i Republikës së Kosovës nuk do ta përkrahë një proces të bisedimeve, i cili nuk i përfill dhe i konteston këto fundamente strukturore dhe identitare të shtetit të Kosovës.

III. Platforma dhe Ligji për procesin e dialogut

Kuvendi i Republikës së Kosovës do të angazhohet për arritjen e një konsensusi sa më të gjerë ndërmjet përfaqësuesve politikë, shoqërisë civile dhe qytetarëve të vendit për procesin e dialogut.

Procesi i arritjes së këtij konsensusi do të zhvillohet nëpërmjet hartimit të Platformës së dialogut, dokument i cili do të përmbajë dhe interpretojë parimet themeltare dhe pozicionet shtetërore mbi të cilat do të zhvillohet dialogu Kosovë - Serbi.

Po ashtu, Kuvendi i Republikës së Kosovës do ta votojë Ligjin për dialogun, me të cilin do të sigurohet vlefshmëria juridike dhe sanksionimi ligjor i përmbajtjes së Platformës së dialogut dhe të përgjegjësive të përfaqësuesve të Delegacionit Shtetëror.

- Në përpjekje për ta promovuar baraspeshën ndërpartiake me qëllim të arritjes së konsensusit sa më të gjerë politik, Platforma për dialogun do të hartohet nga një grup i kryesuar nga një përfaqësues i opozitës parlamentare, pjesëmarrës në procesin e dialogut.
- Komisioni për hartimin e Platformës së dialogut do të formohet dhe përbëhet nga anëtarët e Delegacionit Shtetëror, duke përfshirë edhe përfaqësuesin e Shoqërisë Civile, të votuar paraprakisht me procedurë parlamentare për anëtar të delegacionit.

1. Afatet për hartimin dhe funksionalizimin e Platformës dhe Ligjit për dialogun

Delegacioni Shtetëror do të obligohet që brenda afatit 30-ditësh nga themelimi dhe funksionalizimi i tij t'ia paraqesë Kuvendit të Republikës së Kosovës projekt-dokumentet, si në vijim:

- Projekt-Platformën e dialogut, ku do të saktësohen të gjitha parimet udhëheqëse mbi të cilat Delegacioni Shtetëror do ta përfaqësojë Republikën e Kosovës në procesin e dialogut;
- Projekt-Ligjin mbi dialogun, me të cilin do të definohen dhe saktësohen kompetencat, përgjegjësitë dhe fusha e veprimit të Delegacionit Shtetëror dhe të përfaqësuesve të tij në procesin e dialogut.

IV. Delegacioni Shtetëror: struktura, mandati, funksionimi dhe mbikëqyrja

Kuvendi i Republikës së Kosovës do ta votojë dhe mandatojë një Delegacion Shtetëror, i cili do të jetë entiteti/organi i vetëm i autorizuar për t'u angazhuar në procesin e dialogut.

Delegacioni Shtetëror do ta mbajë të drejtën ekskluzive të komunikimit dhe të interpretimit publik të procedimeve, përmbajtjes dhe arritjeve në procesin e dialogut.

- Delegacioni Shtetëror i ka 12 (dymbëdhjetë) anëtarë, prej të cilëve 7 (shtatë) do të jenë nga partitë e koalicionit qeveritar, 4 (katër) nga partitë opozitare, dhe 1 (një) përfaqësues i Shoqërisë Civile. Delegacioni do të bashkëdrejtohet barabarësisht prej 2 (dy) përfaqësuesve, njëri nga radhët e opozitës parlamentare dhe tjetri nga koalicionit qeveritar. Të dy bashkëdrejtuesit do të votohen në Kuvendin e Republikës së Kosovës, së bashku me Delegacionin Shtetëror.
- Po ashtu, duke synuar përfaqësimin sa më të gjerë dhe të barabartë të vullnetit të qytetarëve të Kosovës, një përfaqësues nga Shoqëria Civile do të jetë anëtar i rregullt i Delegacionit Shtetëror.

Delegacioni Shtetëror do të përbëhet nga këta përfaqësues politikë të votuar nga Kuvendi i Republikës së Kosovës:

- Shpend Ahmeti (PSD), Fatmir Limaj (Nisma), bashkëdrejtues,
- Enver Hoxhaj (PDK), anëtar,
- Avni Arifi (AAK), anëtar,
- Behgjet Pacolli (AKR), anëtar,
- Visar Ymeri (PSD/vend i rezervuar për opozitën), anëtar,
- Dukagjin Gorani (PSD/ vend i rezervuar për opozitën), anëtar,
- Mahir Yagcilar (Grupi 6+), anëtar,
- Dardan Gashi (zv.kryeministër), anëtar,
- Një anëtar nga Shoqëria Civile,
- Një përfaqësues i komunitetit boshnjak,
- Një përfaqësues nga opozita.

1. Udhëheqja dhe mbikëqyrja proporcionale

Komisionet punuese përbëjnë bërthamën e Delegacionit Shtetëror. Pavarësisht numrit të tyre, udhëheqja profesionale dhe mbikëqyrja politike do të shpërndahet barabarësisht (50:50) ndërmjet përfaqësuesve të subjekteve pjesëmarrëse të pushtetit dhe opozitës.

2. Komisioni Parlamentar për Mbikëqyrje të Dialogut

Delegacioni Shtetëror do të raportojë në mënyrë të rregullt rreth ecurisë së procesit të dialogut para Komisionit për Mbikëqyrjen e Dialogut.

- Komisioni për Mbikëqyrjen e Dialogut do të themelohet nga Kuvendi i Republikës së Kosovës. Ai do të përbëhet nga përfaqësues të të gjitha subjekteve parlamentare dhe do të plotësohet me anëtarë të përzgjedhur nga Shoqëria Civile.
- Komisioni për Mbikëqyrjen e Dialogut do të udhëhiqet nga një përfaqësues i partive opozitare, pjesëmarrëse në procesin e dialogut.

3. Vendimmarrja në Delegacionin Shtetëror

Vendimet në Delegacionin Shtetëror do të jenë konsensuale. Me konsensus në këtë rast do të nënkuptohet procedura e arritjes së pajtimit të njëzëshëm/unanim të të gjithë përfaqësuesve të subjekteve pjesëmarrëse në procesin e dialogut.

V. Roli qendror i Kuvendit të Republikës së Kosovës në procesin e dialogut

Kuvendi i Republikës së Kosovës mban rol qendror në procesin e dialogut.

Delegacioni Shtetëror, i votuar dhe i mandatuar nga Kuvendi i Republikës së Kosovës, ka të drejtë dhe mban përgjegjësi të negocimit dhe arritjes së marrëveshjes gjatë procesit të dialogut.

- Mandati i liderëve institucionalë të Republikës së Kosovës në procesin e dialogut do të jetë në përputhje të plotë me Kushtetutën e Republikës së

Kosovës. Çdo veprim i tyre përtej mandatit të saktësuar me Kushtetutë do të konsiderohet i pavlefshëm dhe do të përbëjë shkelje të rëndë të Kushtetutës dhe ligjeve të Republikës së Kosovës.

- Mandati i përfaqësuesve të tjerë në Delegacionin Shtetëror do të jetë në përputhje me kompetencat dhe përgjegjësitë e mbarështuara në Platformën dhe Ligjin për dialogun. Çdo veprim i tyre përtej këtyre kompetencave do të konsiderohet i pavlefshëm dhe do të përbëjë shkelje të rëndë të Kushtetutës dhe të ligjeve të Republikës së Kosovës.
- Marrëveshja përfundimtare, e cila mund të arrihet në procesin e dialogut, do t'i nënshtrohet një referendumi konsultativ para se të votohet në Kuvendin e Republikës së Kosovës.
- Çfarëdo veprimi i institucioneve të Republikës së Kosovës në raport me Republikën e Serbisë duhet të bashkërendohet dhe të miratohet dyanshëm ndërmjet institucioneve të Republikës së Kosovës dhe Delegacionit Shtetëror.
- Marrëveshja përfundimtare, e cila mund të arrihet në procesin e dialogut, do të konsiderohet e vlefshme vetëm pas ratifikimit të saj në Kuvendin e Republikës së Kosovës sipas procedurës kushtetuese për ratifikimin e marrëveshjeve ndërkombëtare, me 2/3 e votave të të gjithë deputetëve.

Kryetari i mbylli punimet e seancës në orën 18:50 minuta.

Kryetari i Kuvendit:
Kadri VESELI

*Procesverbalin e hartoi:
Drejtorja për Çështje Plenare dhe Procedurale*